

《功德本頌》

法尊法師 譯

諸功德本謂恩師¹，如理依止是道基，善了知己多策勵，恭敬親近祈加持。
偶一得此暇滿身，知極難得具大義，遍諸晝夜恒無間，生取堅心願加持。
身命動搖如水泡，速疾壞滅當念死，死後如影隨於形，黑白業果恒隨逐。
獲定解已於罪聚，雖諸小惡亦應除，勤修一切妙善聚，常不放逸祈加持。
受用無厭眾苦門，不可保信三有樂，見過患已當希求，解脫妙樂願加持。
清淨意樂所引發，正念正知不放逸，聖教根本別解脫，修為堅實祈加持。
如自沉沒三有海，慈母眾生悉如是²，見已荷度眾生擔，修菩提心願加持。
發心若不學三戒，當知定不證菩提，故應勤發大精進，學菩薩戒祈加持。
散馳邪境令寂滅，如理觀察真實義，寂止妙觀雙運道，速當生起願加持。
善修共道成法器，乘中最勝金剛乘，諸善丈夫勝津梁，願速趣入祈加持。
爾時二種成就本，謂護淨律三昧耶，願獲真實決定解，捨命守護祈加持。
次正通達續部心，二次宗要善勤習，四座瑜伽不放漫，如師教修願加持。
願說如是妙道師，及正修伴堅固住，內外一切諸障礙，速疾息滅祈加持。
願一切生不捨離，善師受用正法樂，圓滿道地諸功德，速證勝位金剛持。

¹ 依藏本或譯為「諸功德本具恩尊」。

² 依藏本或譯為「是母眾生悉如是」。